

Igual...Pero Mester Tin Ordu

Derechonan igual! Oportunidatnan igual! Lemanan di esnan ku ta lucha pa emansipashon di hende muhé ta resoná. Segun nan, hende hòMBER ta imponé nan boluntad riba e sekso femenino, ta tene nan abou, i tin bes ta abusá di nan.

Den muchu kaso, e kehonan aki ta bèrdat. Den muchu kaso, hende muhé no tin derecho igual. Den muchu kaso, e sekso ku mas forsa físiko a probechá di damanan. Nos no mester tolerá inhustisia kontra kualke pèrsona di kualke sekso

Ma e abusonan aki ta simplemente rekòrdá nos ku nos ta ignorá instrukshon di Esun ku a krea hende hòMBER i hende muhé. Si nos biba segun Su Manual, Skritura santu, ningun di e inhustisianan aki lo a sosodé, pasobra nos Kreador sa kon e relashon entre esposo i esposa por funshoná optimal.

Dios ta duna instrukshon spesífiko ku no ta masha popular awendia: "Boso muhénan, someté na boso mes kasá, méskos ku na Señor" (Efesionan 5:22). Hopi hende tin gana di saka e teksto ei (i otronan similar) for di Beibel. Ma nos tin ku komprendé loke Dios ta bisa. E palabra "someté" ta un palabra militar ku ta nifiká "pa pone den puesto òf rango abou di." Pa por tin òrdu den ehèrsito, kada soldá mester pone su mes bou di rango di esun riba dje. P'esei e soldá ta pone su mes bou di serzjant, serzjant ta someté na lùitenant, lùitenant ta pone su mes bou di puesto di general, èts. Pues, e palabra "someté" tin di hasi solamente ku **puesto**--no balor--di e pèrsona. Kada pèrsona tin balor igual, tòg kada un tin ku someté na esun riba dje pa por tin òrdu.

Pues, e instrukshon di e teksto aki ta pa e **esposa pone su mes den rango bou di su esposo**. Esaki no kier men ku e muhé ta inferior. Ma mester tin òrdu den famia, i Dios a selektá e hòMBER pa tin e puesto di kabes di kas. Esei tampoko no ta nifiká ku e hòMBER ta superior. Tantu esposo komo esposa ta igual i tin balor igual komo pèrsona. Ma den puesto, e esposa ta someté na e esposo.

Di bèrdat, e struktura aki ta normal den tur parti di nos komunidad. E suidadano tin ku someté na esnan ku ta riba dje, esta gobernantenan i esnan ku ta representá nan: ontvanger, polis, èts. E empleado mester pone su mes den rango bou di doño di su trabou, hefe, manager, èts. Dosentenan lo nenga duna lès si alumnonan e kere ku nan tin e mésun puesto ku nan instruktornan. Yunan mester obedesé nan mayornan. Den ningun kaso, un pèrsona tin mas balor ku un otro. Tur ta igual den bista di Dios. Ma pa por tin òrdu den nos komunidad, un mester someté na (pone su mes den rango bou di) esnan ku ta riba nan.

Ta notabel ku asta den e trinidat divino tin òrdu. Maske nos no por komprend'é, nos ta aseptá ku Beibel ta siña ku e Tata, Yu, i Spiritu Santu ta igual. Tur tres ta un solo Dios! No tin distinsjon. Ma tòg Skritura ta mustra ku Dios Tata tin puesto mas haltu ku Dios Yu: "Kristu ta kabes di kada hòMBER, hòMBER ta kabes di muhé, i Dios ta kabes di Kristu" (1 Korintionan 11:3).

Di mésun forma e esposa mester pone su mes bou di puesto di su kasá. Esaki no ta algu ku ta bai fásilmente tur ora. Tin hopi hende hòMBER ku no ta tuma nan responsabilidat na serio komo kabes di kas. Otronan ta hiba un klase di bida ku ta laga hopi di deseá. Si esei ta e kaso, e esposo mester kambia. Ma esei no ta anulá Dios Su instrukshon na esposanan.

Kabayeronan talbes ta gosa e instrukshon bíbliko aki i ta us'é komo un klòp pa pone hende muhé obedesé nan. P'esei ta na su lugá pa klaria algun punto.

Ripará ku Dios a dirigí e instrukshon aki na **hende muhé**. E no a bisa "Kabayero, sòru ku bo esposa ta someté!" No ta tarea di e hòMBER pa obligá su esposa obedes'é. E esposa mester someté boluntariamente, pasobra Dios ta bisa, no pasobra su kasá ta insistí. Dios no ta aseptá machismo!

Dios tampoko no a instruí TUR hende muhé pa someté na TUR hende hòMBER. El a bisa bon kla ku e esposa mester someté na un hòMBER spesífiko: "**boso mes**" esposo.

Si nos biba conforme ku e instrukshon pèrfekto di nos Kreador hañá den Beibel, nos lo evitá hopi tenshon entre e seksonan, pasobra Skritura santu ta siña ku hende muhé i hende hòMBER ta igual, pero mester tin òrdu den kas.